

Odluku kojom se poništava Odluka Skupštine Javnog preduzeća Međunarodni aerodrom «Sarajevo» o promjeni imena preduzeća

Koristeći se ovlaštenjima koja su visokom predstavniku data u članu V Aneksa 10 (Sporazum o implementaciji civilnog dijela Mirovnog ugovora) Općeg okvirnog sporazuma za mir u Bosni i Hercegovini, prema kojem je visoki predstavnik konačni autoritet u zemlji za tumačenje gore navedenog Sporazuma o implementaciji civilnog dijela Mirovnog ugovora; i posebno uzevši u obzir član II 1. (d) istog Sporazuma prema kojem visoki predstavnik "pomaže, kada ocijeni da je to neophodno, u rješavanju svih problema koji se pojave u vezi sa implementacijom civilnog dijela Mirovnog ugovora";

Pozivajući se na stav XI.2 Zaključaka sa Konferencije za implementaciju mira održane u Bonu 9. i 10. decembra 1997. godine, u kojem je Vijeće za implementaciju mira pozdravilo namjeru visokog predstavnika da iskoristi svoj konačni autoritet u zemlji u vezi sa tumačenjem Sporazuma o implementaciji civilnog dijela Mirovnog ugovora, kako bi pomogao u iznalaženju rješenja za probleme u skladu sa gore navedenim "donošenjem obavezujućih odluka, kada ocijeni da je to neophodno", o određenim pitanjima, uključujući i (prema tački (c) stava XI.2) "mjere kojima se osigurava implementacija Mirovnog sporazuma na cijeloj teritoriji Bosne i Hercegovine i njenih entiteta, kao i nesmetano funkcioniranje zajedničkih institucija";

Konstatirajući da je Skupština Javnog preduzeća Međunarodni aerodrom «Sarajevo» 23. septembra 2005. godine donijela odluku o izmjenama Statuta preduzeća prema kojoj se naziv preduzeća mijenja u naziv Međunarodni aerodrom «Alija Izetbegović»;

Konstatirajući takođe da su ove izmjene Statuta Javnog preduzeća registrovane kod Općinskog suda u Sarajevu 3. oktobra 2005. godine;

Priznajući da bi takva odluka mogla utjecati na nesmetano funkcioniranje zajedničkih institucija zbog isticanja činjenice da je Međunarodni aerodrom «Sarajevo», uprkos tome što je glavni međunarodni aerodrom koji opslužuje glavni grad Bosne i Hercegovine, smješten na teritoriji jednog entiteta i njime upravlja jedan entitet i da naglašava osjećaj da aerodrom ne pripada i ne dočekuje sve njegove konstitutivne narode;

Podsjećajući da je pomirenje među konstitutivnim narodima Bosne i Hercegovine još krhko i moglo bi biti ugroženo navedenom odlukom;

Konstatirajući da je Upravni odbor Vijeća za provedbu mira, na sastanku na nivou ambasadora 14. oktobra 2005. godine, dao izjavu u kojoj poziva da se odluka o promjeni imena Međunarodnog aerodroma «Sarajevo» preispita, na transparentan način i nakon konsultacija sa predstavnicima svih konstitutivnih naroda i ostalih;

Ističući da je međunarodna predodžba o jednoj zemlji veoma vezana za to kako funkcioniraju njene glavne tranzitne luke i kako se doživljavaju, kako iznutra tako i izvana; da postoji realna opasnost da će se i drugi međunarodni aerodromi u Bosni i Hercegovini sada «etnički preimenovati» i da bi inostranom ugledu Bosne i Hercegovine moglo veoma štetiti kad bi aerodromi u zemlji postali «etnički» aerodromi;

Ističući takođe da glavni međunarodni aerodrom države, smješten u glavnom gradu Sarajevu, daje prvi utisak koji dobije većina onih koji posjećuju BiH, a njegov moderan i neutralan izgled predstavlja poslijeratnu obnovu i napredak koji je BiH ostvarila u proteklih deset godina;

Razmotrivši, konstatirajući te imajući u vidu sve navedeno, visoki predstavnik donosi sljedeću

**ODLUKU KOJOM SE PONIŠTAVA ODLUKA SKUPŠTINE JAVNOG PREDUZEĆA MEĐUNARODNI AERODROM
«SARAJEVO»**

O PROMJENI IMENA PREDUZEĆA

Član 1.

Poništava se odluka br. 01-4947 od 23. septembra 2005. godine (u daljem tekstu: Odluka) koju je donijela Skupština Javnog preduzeća Međunarodni aerodrom «Sarajevo» o izmjenama Statuta preduzeća i promjeni imena u Javno preduzeće Međunarodni aerodrom «Alija Izetbegović» društvo sa ograničenom odgovornošću.

Svi pravni akti ili odluke doneseni u cilju provođenja te Odluke smatraju se ništavim.

Član 2.

Ova odluka stupa na snagu odmah i odmah se objavljuje u «Službenim novinama Federacije Bosne i Hercegovine».

Sarajevo, 14. oktobar 2005.

*Paddy Ashdown
Visoki predstavnik*